


“Tsohle ke li Etsa tse Ncha”



SABATHA MANTSIBOEA

Bakeng sa thuto ea Beke ena, Bala:

Tšen. 19:6–19; Johanne 14:1–3; 2 Ba-Thess. 1:8–10; Tšen. 21:1–21; Jer. 4:23–26; 1 Ba-Kor. 6:2, 3.

Temana ea Khopolo:

“Joale ea lutseng teroneng, o re: ‘Bonang, ntho tsohle ke li etsa tse ncha. A ntoo re ho ’na: ngola; hobane lipolelo tseo li tiile, ke tsa ’nete’” (Tšenolo 21:5).

Ho timetsoa ha Babylona oa nako ea bofelo ke litaba tse bosula ho bao ba ikopantseng le mofuta ona oa bolumeli bo khelohileng. Ho batho ba Molimo, leha ho le joalo, ke litaba tse molemo (Tšen. 19:1–7). Babylona e jara boikarabello ba ho hohella matla a polotiki a lefatše ho ba hlorisa le ho ba hlokofatsa (Tšen. 18:24). Ho timetsoa ha sera sena se sehlo ho bolela topollo le pholoho. Ka ho timetsoa ha Babylon, thapelo ea bana ba Molimo, ponong ea tiiso ea bohlaho, qetellong ea arabeloa. Sello sa bona: “O tla lieha ho le ho kae, Morena?” se emela sello sa batho ba Molimo ba hateletsoeng le ho hlokofatsoa ho tloha ka Abele ho isa nakong eo Molimo qetellong a tla be a pheteletsa bana ba hae (Pes. 79:5; Hab. 1:2; Dan. 12:6, 7). Buka ea Tšenolo e tiisetsa bana ba Molimo hore bobbe, khatello, le bohloko lit la fihla qetellong.

Joale ke nako ea hore Krete a tle ka ’muso oa hae oa ka ho sa feleng. Likhaolo tse setseng tsa Tšenolo li hlalosa, e seng feela ho timetsoa ha Babylona oa nako ea bofelo, empa hape ho timetsoa Satane le bobbe bohle. Re fuoa pono, hape, ea ho thehoa ha ’muso a Molimo oa ka ho sa feleng.

**Ithute thuto ea beke ena ho lokisetsa Sabatha, 30 Hlakubele.*

Mokete oa Lenyalo oa Konyana

Bala Tšenolo 19:6–9 'moho le Johane 14:1–3. Ke joang lenyalo hantle le hlahosang kopano e sa leng e lebelloa ka nako e telele e lipakeng tsa Kreste le batho ba hae?

Litemaneng tsena, Morena o sebelisa setšoantšo sa mokete oa se-Juda ho re ruta 'nete. Monyali o ne a tla ea ntlong ea bo monyaluoa ho ea etsa peheletso. Ha bohali bo se bo phethiloe, bobeli boo bo ne bo nkoa bo se bo nyalane, empa ba ke ke ba lula 'moho. Monyali o ne a tla khutlela hae ntlong ea nta'tae ho lokisa bolulo bakeng sa bona. Monyaluoa o ne a sala tlung ea nta'tae ho itokisa le eena. Ha litokiso li se li phethetsoe, monyali o tla khutla le ho nkela monyaluoa ntlong ea nta'tae, moo mokete oa lenyalo o tla ho ba hona teng. Lilemo tse like tse peli tse fetileng, Kreste o ile a siea lehae la hae la leholimo ho tla lebelelsa mosali oa hae lefatšeng. Ka mora ho lefa bohali ka bophelo ba hae, Golgotha, o ile a khutlela tlung ea nta'tae "ho lokisa bolulo" bakeng sa monyaluoa oa hae (sheba Johanne 14:2, 3) ha eena a setse lefatšeng a ntse a itokisa. Qetellong ea nako, o tla khutla le ho mo nkela tlung ea nta'tae.

Tšenolo 19:8 e bolela hore line e ntle e hloekileng e fanoe ho monyaluoa ke Kreste. Sena se bontša hore batho ba Molimo ha na letho leo ba ka le supang ka liketso tsa bona. Liaparo tsa batho ba Molimo li emela "liketso tsa ho loka tsa bahalaleli", liketso tse tšileng e le tholoana ea kopano ea bona le Kreste, ea phelang ka ho bona. Liaparo tsena li hlatsoitsoe maling a Konyana (Rev. 7:14). Ha a ntse a le lefatšeng, Jesu o ile a bolela setšoantšo ka lenyalo. Leha ho le joalo, e monga a ba memuo a ikhethela ho apara seaparo sa hae ho e-na le sa lenyalo se fanoang ke morena, 'me o ile a lelekoa moketeng oa lenyalo (Matt. 22:8–14).

Tšenolo 3:18 e bontša hore seaparo se fanoang ke Kreste ke tlhoko e kholo ea batho ba Molimo ba phelang nakong ea ho qetela. Jesu o nehelana ho ba-Laodicea ho "ithekela" ho eena seaparo sena, ho bontša hore o kopa ho ntho e 'ngoe sebakeng sa e 'ngoe. Re lahla boikhabo le boitšepo ho bka bophelo ba botšepahi le kutlo ho Kreste le ho tšepa liketso tsa hae e le tšepo ea pholoho ea rōna.

Ha re bolokoe ke mesebetsi ea rōna, empa ke "liketso life tsa ho loka" tseo u li etsang tse thusang ho hlalosa mofuta oa bophelo boo u bo phelang?

Qetello ea Armageddone

Bala Tšenolo 19:11–16. Lebitso la Kreste e le “Lentsoe la Molimo” (Tšen. 19:13), le taba ea sabole e tsoang molomong oa hae, li supa eng ka bohlokoa ba ntoa ea ho qetela?

Seo re se bonang mona ke se supang ho khutla labobeli ha Kreste, phethahatso ea tšepiso eo balumeli ka lilemo tsohle e sa leng ba e labalabela. Ela hloko puo: Ke tlhoho ka hohle. Jesu o hlotse Satane leholimong; o hlotse Satane lefelleng; o mo hlotse sefapanong; 'me o tla mo hlola le ho khutleng ha hae.

“Haufinyane ho tla hlaha bochabela leru le letšo le lenyenyane, le lekaalo ka seatla sa motho. Ke leru le potapotileng mopholosi le bonahalang ha le le hole e ka le okametsoe ke botšo. Batho ba Molino ba tseba sena e le pontšo ea Mor’a motho. Ka khutso eohle ba shebile ho lona ha le ntse le atamela lefatšeng, le ntse le eketsa ho khanya le khahleha, ho fihlela e le leru le leholo le lesoeu, bokatlase ba lona bo joalo ka mollo o timeletsang, 'me ka holimo ho lona e le mookoli oa selekane. Jesu o palame e le mohloli e moholo. E seng joalo ka ‘motho oa mahloko,’ ho noa senoelo sa ho baba, sa tlotlollo le bomalimane, o tla, e le mohloli leholimong le lefatšeng, ho ahlola ba phelang le ba shoeleng. ‘Ka botšepahi le ’nete,’ ‘o ahlola le ho loana ka ho loka.’ ’me ‘makhotla a leholimo’ (Tšenolo 19:11, 14) a mo latela. Ka melodi ea thabo ea mangeloai a halalelang, letšoele le se nang palo, ba mo latela tselang. Leholimo le bonahala le tletse ka thabo—‘mashome a liketete a baloang ha mashome a likete.’ Ha ho monoana oa motho oa ka tsebang ho ngola pono eo; ha ho kelello ea ngoana motho e ka lekanang ho lekanya botle boo.”—Ellen G. White, *The Great Controversy*, p. 641.

Ho 2 Ba-Thesalonika 1:8–10, Paulose o fana ka tlhaloso e 'ngoe ea tlhoho ea Kreste, ho khutleng la bobeli, ha mesuso eohle ea lefatše le matla bolumeli, ba neng ba ikopantse khahlanong le eena, e se e felisitsoe, 'me batho ba hae ba se ba lopolotsoe ka ho sa feleng.

Tšenolo 19 e hlalosa mekete e 'meli, o mong temaneng ea 9 ha o mong o le temaneng ea 17, 18. Mokateng o mong oa lijo u oa ja, ha ho o mong o jeoa uena. Ho thata ho nahana khohlano e pakeng tsa se etsahalang le se tlang toantšanonng ena e kholo bakeng sa motho e mong le e mong. Tšoantšetso ee e lokela ho ruta eng ka moo re lokelang ho tiea kateng ho nka tumelo ea rōna le thomo eo tumelo ea rōna e re biletsang ho nka karolo ho eona?

Lilemo tse Sekete

Bala Tšenolo 20:1–3 'moho le Jeremia 4:23–26. Nakong ea lilemo tse sekete, boemo ba lefatše ke bofe? Ke ka litsela li fe Satane a tlanngoeng ka liketane?

Lilemo tse sekete li qala ka ho khutla ha Krete. Ka nako ena, Satane le mangeloi a hae a oeleng ba ea tlangoa. Ho tlangoa ha Satane ke ha tšoantšetso, hobane libopuo a tsa moea li ke ke tsa tlangoa. Satane o tlangoa ka maemo. Likotlo li sentse sebopeho sa lefatše le ho felisa batho teng, ho le tlisa boemong ba tlokotsi ho tšoantša lefatše pele ho tlholeho (Gen. 1:2). Boemong boo, lefatše le sebetsa joalo ka teronko ea Satane ka lilemo tse sekete. Hobane ha ho batho bao a tla ba leka le ho ba hlokofatsa, seo Satane le matemona a hae ba ka se etsang ke ho nahana ka litla-morao tsa ho koenehela Molimo.

Bala Tšenolo 20:4–15. Bahalaleli ba ho kae ka nako ea lilemo tse sekete?

Tšenolo e bontša hore batho ba Molimo ba tla qeta lilemo tse sekete leholimong sebakeng seo Krete a se lokisitseng bona. Johanne o ba bona ba lutse literoneng e le baprista le marena, ba ahlola lefatše. Jesu o tšepisitse barutuoa baa e hore ba tla “lula literoneng tse leshome le metso e ’meli, ba a hlola meloko e leshome le metso e ’meli ea Iseraele” (Matt. 19:28). Paulose o boletse hore bahalaleli ba tla a hlola lefatše (1 Ba-Kor. 6:2, 3).

Kahlolo ena e malebana le ho se ee ka tšobotsi ha liketso tsa Molimo. Nalaneng eohle Satane o tlisitse lipotso-potso semelong sa Molimo le mokhoa oo a etsang lintho ka oona ka libopuo tseo a li bopileng. Nakong ea lilemo tse sekete, Molimo o lumella ba lopolotsoeng ho nyarela litlaleho tsa nalane e le hore ba tle ba thole likarabo lipotsong tsohle tse malebana le ho se ee ka tšobotsi le leqeto tsa hae malebana le ba lahlehileng, hammoho hape le lipotso tse amanang le tšebetso ea hae maphelong a bona. Qetellong ea lilemo tse sekete, lipotso tsohle malebana le toka ea Molimo li tla fihlela khutlo ka ho sa feleng. Batho ba Molimo ba khona ho bona ka nqane ho seriti sa pelaelo sa liqoso tsa Satane hore li ne li se na motheo. Joalo ba loketse ho ba lipaki tsa tsamaiso ea toka ea Molimo kahlolong ea ho qetela.

Ke mang mahareng a rōna ea se nang lipotso, lipotso tse thata, tseo ha joale li bonahalang li se na likarabo? Seo se re bolella eng ka semelo sa Molimo sa hore ka letsatsi le leng, o tla re fa likarabo?

“Maholimo a Macha le lefatše le Lecha”

Ka mora ho felisoa ha sebe, lefatše le tla nchafatsoa ho ba lehae la ba lopolotsoeng. Le tla ba joang? Ho Tšenolo 21:1, Johanne o “bone leholimo le lecha le lefatše le lecha.” Ba-Juda ba ne ba tseba maholimo a mararo: sepaka-paka, leholimo la linaledi, le sebaka seo Molimo a lulang ho sona (sheba 2 Ba-Kor. 12:2). Ho Tšenolo 21:1, sepaka-paka sa lefatše ke sona seo ho buuoang ka sona. Lefatše le silafetseng le leholimo (sepaka-paka) li ke ke tsa emela boteng ba Molimo (Tšen. 20:11). Lentsoe ncha ka se-Gerike (kainos) le supa ntho e ncha ka boleng, e seng ka tlhaho le nako. Lefatše lena le tla hloekisoa ka mollo ho le khutlisetsa boemong ba lona ba pele (2 Pet. 3:10–13). Taba e thahasellisang ka ho fetisisa ke hore ea pele eo Johanne o e boneng lefatšeng le lecha ke hore leoatle ha le sa le eo. Taba ea hore e be Johanne o bua ka “leoatle” (ka ho tiea ho joalo) e bontša hore kelellong ea hae mohlomong e ne e le leoatle le mo potileng Patamose, leo e neng e le papiso ea karohano le mahlomola. Bosieo ba leoatle leo lefatšeng le lecha ho eena ho ne ho bolela bo sieo ba bohloko le mahlomola.

Bala Tšenolo 21:2–8 le 7:15–17. Ke ho tšoana ho fe tlhalosong ea lefatše le lecha, le serapa sa Edene ho Genese 2?

Bophelo bo se nang mahlomola le lefu lefatšeng le nchafetseng bo tiisoa ke boteng ba Molimo nahareng a batho ba hae. Boteng bona bo senoloa Jerusalem e mocha, “tabernaकेle ea Molimo” (Tšen. 21:3), moo Molimo a tla lula la batho ba hae. Boteng ba Molimo lefatšeng le nchafalitsoeng bo be joalo ka tempele. Boteng ba Molimo bo netefatsa tokoloho mahlomelng: ha lillo, lefu, mahlomola, ho bokolla, kapa bohloko, tseo tsohle e leng litla morao tsa sebe. Ka ho felisoa ha sebe “lintho tsa pele li fetile” (Tšen. 21:4).

Taba ena e ile ea behoa hantla ke Maria le Maretha, lefung la ngoan’abo bona Lazaro: “Morena, hoja o ne o le teng, ngoan’abo rōna a ka be a sa shoa” (John 11:21). Likhahitseli li ne li tseba hore lefu le ke ke la ba teng moo Krete a leng teng. Ka tsela e tšoanang, boteng ba Molimo lefatšeng le lecha bo tla fana ka tokoloho bohlokong le mahlomoleng ao re thulanang le oona ha joale. Ena ke tšepo e kholo eo re fuoang ka Krete, tšepo e tiisitsoeng ka mali a hae.

Hobaneng tšepiso ena ea boteng bo bocha lefatšeng le lecha e le khubu ea sohle seo re se lumelang? Ke molemo o fe oo tumelo ea rōna e ne e tla ba le oona kantle le oona?

Jerusalema e Ncha

Johanne joale o hlalosa motse moholo oa lefatše le lecha, Jerusalema e mocha. Leha e le sebaka sa sebele se luloang ke batho ba sebele, Jerusalema e ncha le bophelo ba tengli ka nqane ho tlhaloso ea bofefatše (sheba 1 Ba-Kor. 2:9).

Bala Tšenolo 21:9–21. Ke limelo li fe tsa ka ntle tsa Jerusalema e mocha?

Jerusalema e ncha ho buuo ka eona e le monyaluo, mosali oa Konyana. Ho Tšenolo 19:7, 8 papiso ena supa bana ba Molimo. Jerusalema e ncha ke sebaka seo Krete qetellong a tla kopanngoa le batho ba hae. Motse o pota-potiloe ke lerako le leholo le liheke li leshome le metso e 'meli—liheke tse tharo lehlakore ka leng la a mane, ho lumella ho kena ka mahlakore ohle. Sena se supa boemo bo akaretsang ba motse. Jerusalema e Ncha bohle ba na le tokelo ea ho kena e sa lekanyetsoang ho ba boteng ba Molimo.

Motse o tsoela pele ho tšoantšoa o lekana ka hohle; bolele, bophahamo, le bophara ke 12,000. Ho lekana hona ho lihuku li 12. Ka hona, motse o etsa kakaretso ea 144,000, e leng palo e tšoantšang kakaretso ea batho ba Molimo ba lopolotsoeng ba mengoaha eohle (Tšen. 7:4). Tempeleng ea Testamente ea Khale, sehalalelisiso se ne se lekana ka hohle (1 Marena 6:20). Jerusalema e ncha ka hona, ha e sebetse e le fela e tempele empa e le sehalalelisiso. Tempeleng ea lefatše, e ne e le moprista e moholo fela ea neng a ka kena ka sehalalelisisong. Jerusalema e ncha, ona ke monyetla o fanoang ho bohle ba lopolotsoeng.

Bala Tšenolo 21:21–22:5. Ke limelo li fe tsa ka hare tsa m otse tse u hopotsang ka serapa sa Edene? Bohlokoa ba polelo ea hore ha ho sat la ba le thohako motseng oo ke bo fe (Tšen. 22:3)?

Semelo se ka holimo sa Jerusalema e ncha ke noka ea bophelo e phallang ho tsoa teroneng ea Molimo (sheba Gen. 2:10). Khahlanong le noka ea Babylona, eo batho ba Molimo ba lutseng e le makhoba ba hlolohetsoe Jerusalema (Psalm 137), mabopong a noka ea bophelo Jerusalema batho ba Molimo ba lilemo tsohle ba fumane lehae. Ka mahlakore ka bobeli a noka ho na le sefate sa bophelo seo mahlaku a sona “e leng a ho folisa lichaba” (Tšen. 22:2). Ho folisoa ha ho bolele ho kula, ka ha lefatšeng le lecha ho kula ha ho na ho ba teng. Ho supa ho folisoeng ha maqeba ohle a bakiloeng ke lithibela tse ranthantseng batho nalaneng eohle. Balopolloa ba lilemo tsohle le ba lichaba tsohle joale ke karolo ea lelapa le le leng la Molimo.

Khopolo e Eketsehileng:

Bala Ellen G. White, “Desolation of the Earth,” pp. 653–661; “The Controversy Ended,” pp. 662–678, ho *The Great Controversy*. Buka ea Tšenolo e qetella ka se ileng sa lelekella qalong: ho khutla, la bobeli ha Kreste ng. Ho khutla ha Kreste, ha a tla be a kopana le monyaluoa oa hae, ke ntlha ea sehlohlobo bukeng ena. Leha ho le joalo, buka ha e batla ho beha liketsahalo tsena boemong bo sa lokelang. Hore e be Jesu oat la haufinyane ke bonnete ba pele. Bonnete ba bobeli ke bah ore re ntse re le mona re letetse ho khutla ha hae. Ha re ntse re letile, re lokela ho ba le kutloisiso e hlakileng ea melaetsa ea Tšenolo, 'me re ka fumana sena ka ho e bala hape le hape ho fihlela qetello ea lintho tsohle e tlile. Melaetsa ea buka ea Tšenolo khafetsa e re hopotsa, ha re ntse re letile, hore rer se k era sheba lintho tsa lefatše lena, empa ho tsepamisa mahlo a rōna ho eena eo e leng tšepo ea rōna. Kreste oa Tšenolo ke karebo ea litebellong le litaba-tabelong tsohle tsa batho le hara mathata le ho se tsitse ha bophelo. O tšoaretse bokamoso ba lefatše lena le bokamoso ba rōna letsohong la hae. Buka hape e re hopotsa hore pele bofelo bo tla, re tšepetsoe mosebetsi oa ho phatlalatsa molaetsa oa ho khutla ha hae ho haufi lefatšeng. Ho emela ho khutla ha hae ha rōna ho se ho phomotseng, empa ho tšebetsong. Bobeli Moea le kereke li re: “‘Tloho!’” (Tšen. 22:17). Re lokela ho kena memong eo. Ke litaba tse molemo, 'me ka hona li lokela ho phatlalatsa ho batho ba lefatše lena.

Lipotso tsa Puisano:

- 1. Nahana ka lilemo tse sekete le kahlolo e tlang hang ka mora lilemo tse sekete. E re ruta eng ka Molimo hore e be ka mora hore bahalaleli ba be le lilemo tse sekete hore lipotso tsohle tsa bona li arajoe e be Molimo ke hona a tlisang kotlo holima ba lahlehileng?**
- 2. Tšenolo 1:3 e tšepisa tlhohonolofatso ho ba mamelang, le ba balang, le ba utloang, le ho boloka boporofeta ba Tšenolo. Ha re qetella boithuto ba rōna ba buka ena, ke lintho life tseo u li fumaneng tseo u lokelang ho li utloa le ho li boloka?**